

## Stade Zeit

Der Vater hält den Wunschzett'l fürs *Christkind* in der Hand  
Steht im Elektrofachgeschäft im warmen Winterg'wand  
Sei Bua, der hätt gern an *PC* – sei Madl fänd a *iPhone* schee  
Und dass im Schlafzimmer nimma so fad is, moant sei Frau  
Hätt sie gern an die Wand vorm Bett an *80-Zoll-TV*

Die Leit, die drängen und die schiab'n – er schwitzt scho in seim Pelz  
Im Hintergrund spuin's *AC/DC* neba *Jingle Bells*  
Für d'Schwiegerleit no a *CD* – von ihrem *Hansi Hintersee*  
Nach fünf Stund steht er patschnass in der Kassenschlange drin  
und fragt si ernsthaft: „Is des jetzt vo *Weihnachten* der Sinn?“

**Ja, jetzt is wieder moi soweit  
jetz is sie da, die stade Zeit  
auf die si jeder narrisch gfreit  
Die stade, stade Zeit**

**Mia hetz'n, wetz'n umanand  
Glücksharmonie im ganz'n Land  
a Rauferei am Bratwurscht-Stand  
Die stade Zeit**

**Und Glühwein sauf ma – G'schenke kauf ma  
bis zum Herzinfarkt**

**The bells are ringing – the angels singing  
drunt im *MediaMarkt*  
STARK !!!**

Der Chef is seit der letzt'n Weihnachtsfeier nimmer frisch  
Liegt mit der Sekretärin seit zwoa Tag scho unterm Tisch  
Er hod an recht'n Glühweinbrand – sie hod sein Christstoin in der Hand  
und gfreit si, dass ihr *Christkind* nächst's Jahr im September kimmt  
So geht's, wenn man „Das Fest der Liebe“ allzu wörtlich nimmt

Da foit's eahm ei: Heit is ja *Heilig Abend* – ganz genau  
Und er hod wieder moi koa G'schenk b'sorgt für sei liabe Frau  
Er rennt in d'Stadt zum *Douglas* nei – und kauft an Duft vo *Gucci* ei  
Er denkt: „Des hob i ihr die letzt'n Jahr scho oiwei g'schenkt“  
Und wichtig is beim Schenken, dass ma si dabei was denkt

**Refrain**

Ja, kurz bevor der *Heiland* kimmt, da flipp'n s' alle aus  
anstatt dem Fest an Sinn zu geb'n, wird der Wahnsinn draus

Die Leit, die macha si verruckt – a jeder duad und rennt  
dabei kannt ma doch g'miatlich beianand sei im *Advent*

Ois muass no jetz und glei passier'n – a so a Spinnerei  
Ma kannt fast glaub'n, wenn's Jahr aufhört, dann is des Leb'n a vorbei

Fürs meiste hätt ma doch des ganze Jahr scho ewig Zeit  
Doch nutz ma oft zum Jahresend erst die Gelegenheit

Des mit der weißen *Weihnacht* – des bleibt eh a Kindheitstraum  
drum leg ma uns dies Jahr zum Trost an *Herbstlaubbläser* untern Baum

Und is am dritt'n Weihnachtstag dann endlich stad und stumm  
Dann dekorier'n s' die Schaufenster scho auf'n *Fasching* um

**Und *ChristmasShopping* – *PartyHopping***  
**Jeder, wie er mag**

**The bells are ringing – the angels singing**  
**Weihnachten is ME- GA- STARK !!!**

**Text und Musik**  
**Michael Bohlmann**  
**11 / 2008**

**Textüberarbeitung**  
**Michael Bohlmann**  
**06 / 2015**